


**Li Laus**



**LAUS  
DE  
Lucian LAPORTE**



**Gui CHAPTAL**  
Felibre Majourau

**LAUS**

**DE**

**Lucian LAPORTE**  
**(1909 – 2012)**

Cigalo latino

Santo-Estello de La Roco-Brou  
2015

# **CIGALO LATINO**

**1881**

**Anfos ROQUE-FERRIER**

(1844 – 1907)

(demessiounàri en 1892)

**1892**

**Edouard MARSAL**

(1845 – 1929)

**1929**

**Père AZEMA**

(1891 - 1967)

**1969**

**Lucian LAPORTE**

(1909 – 2012)

**2014**

**Gui CHAPTAL**

*Segne Capoulié, Gènto Rèino, Car Counfraise, Car felibre e  
Ami, Midamo, Messiès,*

Es un biais de coumença li dicho academico pèr li gramaci, mancarai pas aquest usage ; renouvelle em' emoucioun e recouneissènço, mi gramaci à-n-aquéli que m'an adu vuei davans vous autre.

Gramaci dounc à mi peirin e meirino, d'en proumié à Marìo-Nadalo Dupuis que m'endraiè devers lou Felibrige. Pièi à Jan-Marc Courbet qu'ai couneigu coume baile menant de man de mèstre l'acioun pèr faire viéure nosto culturo e nosto lengo. Enfin au Paire Miquèu Desplanches que despièi mai de quinge an coutriò 'mé la Nacioun Gardiano, éu tambèn a cresegu que poudié sènso crento me prepausa à vòsti sufrage.

Gramaci, Segne Capoulié Jaque Mouttet pèr l'acioun qu'avès de mena lou Felibrige vers la diversita dis ome que fan l'istòri dins li piado di primadié, gramaci tóuti lis àutri majouralo e majourau qu'an bèn vougu vouta pèr iéu, sènso trop saupre de cop que i'a en dequé ère de bon.

De segur, mai o mens, lou sabès despièi mai de trento an, obre pèr la culturo, la lengo au mitan de la Nacioun Gardiano, fidèu à Baroncelli e à mi davancié.

Dempièi sa creacioun en 1904 sièis capitàni se soun succedi e tres soun esta pourta au majouralat : lou capitàni Anfos Arnaud, lou capitàni Enri Aubanel e moun predecessour lou capitàni

Andriéu Dupuis. Fuguère acoumpagna d'ome amouros dóu terraire : Rouquairol, Théron, Fourmaud e bèn d'autre, que m'an assabenta à nosto cultivo.

Lou Felibrige raprocho lis ome e li generacioun, pèr li diferènci, lis óurigino, à l'entour de l'amour dóu païs, de si coustumo e de sa lengo.

\*\*\*

Moun devé maje es de saluda la memòri de mi davancié, que dempièi 1881 an sachu faire canta la cigalo Latino, leissant un rai luminous, pèr me moustra la draio que dève segui. Lou proumié titulàri fuguè Anfós Roque-Ferrier en 1881, pièi seguiguèron Edouard Marsal en 1892, Pèire Azema en 1929 e Lucian Laporte en 1969.

## **Ourigino de la Cigalo Latino**

La Cigalo Latino, fuguè creado en 1881. Fai alusioun à l'idèio Latino que desvouloupè Anfós Roque-Ferrier à l'entour dóu Felibrige latin à Mount-pelié e sus l'ensèn dóu Lengadò. Pendènt uno vinteno d'annado, après la desfacho francéso de 1870, lou Felibrige, beileja pèr Frederi Mistral, vai mena uno proupagando ativo en favour de « l'idèio latino ». S'agis, pèr si membre, d'oubra au raprouchamen di nacioun latino, subretout de la França e de l'Itali, e d'alesti soun unioun futuro dins uno federacioun qui poudrié cap-teni à « l'ogre germanisto ». Pèr acò faire, mouton touto uno tiero de fèsto literàri que ié participon d'escrivan e de representant óuficiau de diferènt païs latin.

Li felibre espèron dous benefice d'aquelo acioun. Au nivèu naciounau, espèron, en lis associant à soun federalisme latin, faire entendre soun message decentralisaire e si revendicacioun en favour di culturo regionalo. À l'escalo dóu miejour francés, « l'idèio latino » deù ié permetre d'enracina lou Felibrige sus de territòri mounte es de manco, e subretout sus la ribo drecho de Rose. Mai sis espèr saran deçaupu. Tre 1890, la proupagando latino dóu Felibrige pèrd soun alen sènso qu'ague poussu faire gagna sis idèio, ni s'impausa vertadieramen coume porto-paraulo dóu miejour.

\*\*\*

## **La vido de Lucian Laporte**

Es nascu lou 9 de novèmbre 1909 à Toulouso, capitalo dóu Lengadò. Soun paire quitè lèu l'araire, pèr èstre emplega de papetarié. Sa maire tiravo d'uno famiho forço moudèsto dóu Rouergue. Fuguè damo de coumpagnié d'uno grando famiho fourtunado, que n'en fara soun eiretiero testamentàri.

Lucian Laporte, fiéu unique, sara abari pèr li quatre femo de l'oustau, si tanto, sa grand e sa maire. A-n-aquelo epoco de soun enfanço, lou gascoun èro enebi de lou chara en famiho, mai l'entendié parla pèr si rèire.

Arribo la Grand Guerro e soun paire es apela souto lou drapèu. Sa maire e lou pichot Lucian van se metre à la sousto à Bragayrac, vilajoun à 35 km de Toulouso, mounte la famiho Laporte a sis óurigino despièi tres cènts an. Lucian que trèvo

l'escolo dóu vilage, es lou soulet drole à pas parla lou gascoun. Es à-n-aquelo pountanado, bagna dins la lengo dóu terraire, qu'apren lou gascoun. Es un pichot serious, que la naturo l'a avantaja d'uno grando memòri que lou menara à faire d'estùdi long e scientifi.

À la fin de la guerro, la famiho rintro à Toulouso. De 1916 à 1920 vai à l'escolo Santo Barbo, pièi intro au Licèu Pèire de Fermat, seguis li cous de matematico e de chimio, passo la licènço de fisico, après un diplomo superieur vèn mèstre d'internat à Roudez, pièi à Sant Gaudens, Fouis, Perigus, en 1938 davvero soun agregacioun.

Ouratour carismati, avié li qualita pèr faire passa si cous, d'un biais plasènt, pèr assabenta, esplica, diverti, mai counvincre sis estudiant dóu necessàri óujeitiéu à davera, pèr la reüssido dis eisamen. Doumaci si coumpetènci baiavo à sis escoutaire l'envejo d'èstre atentiéu.

Mai la segoundo guerro es aqui e de 1940 à 1945 es en captivitat dins un Oflag, camp de presounié aleman, moute èron embarra lis óuficié presounié de guerro. À la liberacioun, s'entourno dins soun país e revèn proufessour à Caus. En 1946, proufessour agrega de fisico e chimio, es afeta pèr soun amenistracioun au licèu Pèire de Fermat à Toulouso. Aqui ié fara quasiment touto sa carriero d'enseigneire, un proufessour que fuguè estima e recouneigu.

Lou 11 de jun 1946, marido Jano Vors, proufessour agrega de matematico. D'aquelo unioun soulido, que fuguè lou rescountre de dos amo, nasquèron cinq pichot (4 chato e un drole). Malurousamen aguè lou malur d'en perdre tres. Restèron dos



chato : Mariò-Liso e Anno-Mariò, que fuguè escais-noumado *Liloia* (ço que vòu dire *Paquerette* en gascoun). Lucian Laporte fuguè un paire atentiéu, bon, forço toulerant, anima d'uno fe crestiano prefoundo e sincèro.

Èro un ome d'uno grandò civilita, sevère mai just, vieù e cren de sis estudiant que de cop partié coume la poudro, disié « *aimer et bien servir sans cesser d'être juste* ».

Maugrat tout, à la retirado fuguè un grand atentiéu, mai souple, acetant lou mounde mouderne.

Lucian Laporte plantè caviho à Toulouso, ensigné à Fermat, renouma pèr èstre un proufessour eisigènt, fasié manja de favo emai de favo is estudiant di classo preparatòri, en particulié i futur medecin. Sa sciènci e soun art de la retourico pivelavon sis ausidou. Aguè coume escoulan Jòrdi Frèche, emé quau entretenguè de relacioun jusqu'à la fin de sa vido, e ié dounè un dedicadis sus soun libre « *La France ligotée* » em' aquèsti mot : « *à Lucien Laporte, l'homme à qui je dois tout ce que je sais en physique, plus l'amour des chemins de fer, sans compter une grande personnalité* ».

Pouèto pintouresc, Lucian Laporte avié tout-plen d'imour, sa grandò passioun èro li camin de ferre, avié pres un abounamen à 8 vo 9 revisto, pas rèn l'estounavo. Prouvesi d'uno flamo memòri, avié un grand amour de la lengo. Ome de sciènci, soun èime n'èro pas counfit dins un passat rege, Lucian Laporte èro un ome d'ordre, de rigour, de metodo, disié « *je suis un homme de règles, un décalogue* », apoundié : « *ni passéiste ni progressiste, ni réactionnaire ni révolutionnaire, pas conservateur* ».

Lucian Laporte amavo l'eisatitudo e la cultivavo, es ço que lou menè à sa passioun di camin de ferre ; baiavo de counferènci sus li camin de ferre sènso ges de noto. Se disié « *mainteneur du raisonnable, préserver et innover* ».

Trouba dins si noto « *aimer à vivre caché et à être compté pour rien* » definis un persounage discrèt. Avié un goust marca pèr la pouèsio, soun preferi èro La Fontaine. Couneissié de pouèmo de tèsto e de tèms en tèms largavo quàuqui vers de Vigny, Mistral, Philadelphe de Gerde.

Laisse à vosto escouto, quàuquis idèio fugidisso, que Lucian Laporte avié nouta dins soun casernet :

« *Les journalistes éclairés, parlant bon français, ne sont pas nuls en science ;*

« *Combattre la mentalité grégaire, l'esprit de building-prison,*

« *Une soif d'uniformité dans l'égoïsme,*

« *Les ignares se mêlent de tout en voulant faire la loi.* »

Se pauso de questioun : « *La politique abaisse et aplatit le courage de beaucoup d'hommes ?* »

Regretavo que « *le loisir studieux n'était pas encore inventé* ».

Franc de soun mestié, participavo à de noumbrósis ativeta :

*La Société d'astronomie populaire,*

*Les amis des Chemins de fer,*

*Les Cadets du Rail,* duberturo de soun maiun i jouine que  
lou souvèton,

Engajamen crestian : paròqui universitàri, s'encarguè de la  
presso catoulico pèr la capelo dóu quartié,

S'investiguè au sen dóu Coumitat di fèsto de Toulouso, lou

Grand Fénétra,  
Sòci de la Counfrarié di Taste Monjete, de vin de l'Aveiroun.

\*\*\*

## Soun engajamen felibren

Fuguè elegi majourau en 1969 à la Santo-Estello de Sant Flour, soutu lou capouleirat d'Elìo Bachas.

Peirineja pèr lou Majourau Bernart Sarriéu, s'encartè au Felibrige en 1935, soutu lou numerò 4214, pièi venguè membre de l'escolo felibrenco deras Pirenéos

Assessor de la Mantenènço Gascougnò-Biarn, souvèto dins uno letro dóu 18 d'abriéu de 1981, en francés dins lou tèste « *...le Félibrige pourrait s'occuper d'essayer de sauver les orthographes et la prononciation des noms de famille et des noms de lieux dont le processus de perte est entamé, comme Graulhet (Grauillett), Finhan (Fignan), Polminhac (Polmignac), Paulhan (Pauillan), et mille autres qu'on peut relever dans la liste des villes publiées pour le code postal .* »

Avié liga de liame d'amista emé lou majourau Jòrdi Girard, e lou flame pouèto-diploumate gascoun, d'ampLOUR éuropenco Bernart Manciet.

Fasié : « *Si les félibres sont avisés, ils refusent d'être prisonniers d'un passé dépassé. Ils sont prêts à se soumettre à des révisions déchirantes.*

*Provençaux, connaissez-vous les Gascons, vos frères du far west !* »

Mantenèire dóu resounable, « bèn faire e leissa dire » èro sa deviso, destaca dóu di di gènt avié basti sa filousoufio de vido sus lou respèt dóu passat, mai avié uno fisanço sènso limito dins l'aveni. Sa culturo scientifico lou menavo a uno analiso rigourouso, touto en retengudo, mai avié la pressentido di cambiament soucietau.

Si reproche, li boutavo à-n-aquéli que fasièn pus soun « *boulot* » pèr emplega soun mot, que fasièn plus soun travail 'mé amour, se leissant ana au tran-tran de la vido e à l'inchaiènço.

Amavo bèn servi, sènso decessa d'èstre just. Pèr éu la verita, sa verita èro foundado sus la realita, reprouchant en quàuquis un de perdre lou bon sèn.

Fasié la guerro au « *franglais* », au patoues « *paname et godillot* », qu'estimavo racisto e emperialisto. « *Des deux, escrivié, qui est l'attaqué ou l'attaquant ?* »

\*\*\*

## **Pèr acaba**

Doumaci Madamisello Mario-Liso Laporte ai poussu realisa lou laus de soun segne paire, à travès li doucumen que me donè sènso retengudo, me permetant ansin de parla dóu majourau Lucian Laporte, e de lou counèisse e Ano-Mario Laporte-Calvet que me donè un diapourama de foutò.

Lucian Laporte fuguè un ome aparaire de la lengo, saberu, un ome de grand devé, que marchavo dre.

Emé grando councideracioun, ai assaja de vous presenta lou majourau Lucian Laporte, d'en presenta un retrat lou mai fidèu pousible, à respèt de sa famiho e de sa memòri. Sènso fierta, siéu counçiènt de sucedi à un ome d'elèi que pourtè naut e fort soun ideau « *l'esprit d'égalité et non de supériorité entre provinces* ».

Gui CHAPTAL  
Felibre-Majourau  
Santo-Estello de La Roco-Brou 2015

\*\*\*

Sourgènt :

Revue d'histoire du XIXème siècle (n° 42 / 2011)

« Les félibres majoraux de 1876 à 2006 », de Pierre Fabre,  
Capoulié dóu Felibrige

« Notes fugaces », de Lucien Laporte.

Photographies, de Madame Anne-Marie Laporte-Calvet.